0.0.1 bahujanahitasuttam

- 1. vuttam hetam bhagavatā vuttamarahatā'ti me sutam:
- **2.** tayo'me (bhikkhave¹) puggalā loke uppajjamānā uppajjanti bahujanahitāya bahujanasukhāya lokānukampāya atthāya hitāya sukhāya devamanussānam. katame tayo?
- 3. idha bhikkhave tathāgato loke uppajjati araham sammāsambuddho vijjācaraṇasampanno sugato lokavidū anuttaro purisadammasārathi satthā devamanussānam buddho bhagavā. so dhammam deseti ādikalyāṇam majjhekalyāṇam pariyosānakalyāṇam sāttham sabyañjanam kevalaparipuṇṇam parisuddham brahmacariyam pakāseti. ayam bhikkhave paṭhamo puggalo loke uppajjamāno uppajjati bahujanahitāya bahujanasukhāya lokānukampāya atthāya hitāya sukhāya devamanussānam.
- 4. punacaparam bhikkhave tasseva satthusāvako araham hoti khīnāsavo vusitavā katakaranīyo ohitabhāro anuppattasadattho parikkhīnabhavasamyojano sammadaññā vimutto. so dhammam deseti ādikalyānam majjhekalyānam pariyosānakalyānam sāttham sabyañjanam kevalaparipunnam parisuddham brahmacariyam

¹bhikkhave'ti potthakesu nadissati. pts page 079

pakāseti. ayam bhikkhave dutiyo puggalo loke uppajjamāno uppajjati bahujanahitāya bahujanasukhāya lokānukampāya atthāya hitāya sukhāya devamanussānam.

- 5. puna ca param bhikkhave tasseva satthusāvako sekho hoti paṭipado bahussuto sīlavatuppanno. so'pi dhammam deseti ādikalyāṇam majjhekalyāṇam pariyosānakalyāṇam sāttham sabyañjanam kevalaparipuṇṇam parisuddham brahmacariyam pakāseti. ayam bhikkhave tatiyo puggalo loke uppajjamāno uppajjati bahujanahitāya bahujanasukhāya lokānukampāya atthāya hitāya sukhāya devamanussānanti.
- 6. etamattham bhagavā avoca. tatthetam iti vuccati:
 - 1. "satthā hi loke paṭhamo mahesī, tassanvayo sāvako bhāvitatto; athāparo pāṭipado'pi sekho, bahussuto sīlavatupapanno.
 - 2. ete tayo devamanussaseṭṭhā, pabhaṅkarā dhammamudīrayantā; apāpuranti amatassa dvāraṃ, yogā pamocenti bahujjane te.
 - 3. ye satthavāhena anuttarena, sudesitam maggamanukkamanti;

idheva dukkhassa karonti antam, ye appamattā sugatassa sāsane"ti.

7. ayampi attho vutto bhagavatā. iti me sutanti.